

Parosifa erup fain Pol-ke Timoti siisimomak

Miimow opora

Iir oko Rom owow saria maneka Nero ikowa-pa wi Pol opap koorapa wuap samoram-ikemik. Naapeya yo uuwowa fan weeserikua naep ona uuwow epaskun Timoti kema suuwak. O Mua Maneka opora wiar opam-ikua nain me wakinok naep, ne pun sira eliwa ookam-ikainok naep parosifa fain siisimomak. Feenap maakek, no Yeesus Krai opora wia maakowa me piipue, ne yoowa ne pina niwkin-na nain me kema suuwe, kekanep Mua Maneka eena uuwowa niek nain uuwoma. Wi mua woos samo-samora nain opora me wiar miime. Opora sira naap nain mua kema eliwa wia samoriya, naap maakek.

1 ¹⁻²Yo Pol-ke parosifa fain no Timoti siisimomiyem, yo Krai Yeesus uuwow mua nain. Mua Maneka ona kookalep efa sesekeya ikiwep Krai Yeesus wameiya-pa eliw ikowa opora yia maep koonowak nain wia maakem-miawiyem. Aria yena muuka eliwa, feenap nefa naiyem, yiena Auwa Mua Maneka ne yiena Maneka Krai Yeesus ikos nefa kemalep nefa saliwikkin no kema sonom eliwa ikainan.

Timoti kekanowowa opora

³Yo no nefa kema suuwap anane amirika ne uura Mua Maneka faremi sira eliwa naakiyem, o eena iiriw yena nembesir pun faremi lotu onam-ikemik nain. Ne yos pun o uuwomami kema melina ikem yame naiyem. ⁴No omon nain nefa kema suuwiyem. Naapeya nefa urufowa naem-ikaiyem, nefa urufap manek akena kemelinen naiyem. ⁵No Krai opora baliwep wiar opap ikon nain pun yo nefa kema suuwiyem, iiriw nena neene Yunis ne nokome Lois opam-ikemik naap. Ne aakisa nos pun naap opam-ikain nefa amisarem. ⁶Iiriw yo wapena ikiwosa iinan-pa nefar wuamkun Mua Maneka Ewar Eliwa-ke nefa kekanowami uuwowa niek. Naapeya aakisa opora-pa nefa kekanowiyem, uuwowa nain baliwep uuw-ikim-ikaeya manekarinok, mukuna manekimik naap. ⁷Moram Mua Maneka eena Ewar yiek nain me maa keker opaka naep yiek, weetak.

Ewar Eliwa nain-ke yiamiya ikaeya kekanep ikemik, ne wia kookalimik ne maa kema suuwap onimik.

⁸Naapeya yiena Maneka opora wia maakowa nain emina me urure, ne yo o muuta nain koora ekap ikem fain pun kema suuwap emina me urure. No Mua Maneka kekanowa niem-ikaiya nain, naap kekanep ona opor eliwa wia maakemi yo efamiya sirirowa eliw aawe. ⁹Mua Maneka ona yia saliwami yia aawok, yena teeria kakeniw-ke yia naep. Nain me i maa mauwa eliwa onamkun yia aawok, weetak. Iiriw eker a miiwa maa me tawerarowa ikok ona yia kemalep Yeesus Krai-pa yia aawowa maep-puak. ¹⁰Ne aakisa fan ona opora yia opomami Yeesus Krai yia aawinok naep sesekeya imenarek. O umowa kekanowa iiwawun nomakep weeser-wuak. Ne ona opor eliwa-pa yia parinaroweya anane eliwa ikowa nain amisaremik. ¹¹Ne yo opor eliwa nain wia maakowa naep ona efa pepekimok. Naeya yo o uuwow mua ne somek mua arep opora wia wafuram-miawomiyem. ¹²Ne yo uuwowa muuta nain anane sirirowa aawiyem, nain emina me ururiyem. Moram Yeesus eena opora wiar opiyem nain baliwep akena amisarem. Ne pun kekanep feenap maiyem, makena, o uuwowa wapena-pa efar wuak nain naap efa urufam-ikaiya, ikip ikip iiwawun ona ekapow fofa-pa.

¹³Aria yo opora nefa maakem nain no iiwawun kakeniw naap wia maake. Ne Yeesus Krai opora baliwep wiar opap, ona yia kookaliya nain naap wia ofakowam-ike. ¹⁴Uuwow eliwa Mua Maneka no wapena-pa wuomek nain kakeniw naap kakaltam-ike. Ewar Eliwa eena yiamiya ikaiya nain-ke nefa asipam-ikaeya naap uuwam-ikainan.

¹⁵Aria no amisaren, wi Esia kame unowa nain yo efa piipuamik. Figelus Ermogenes ikos pun naap, yo efa piipuamik.

¹⁶⁻¹⁷Ne Onesiforus-ke wiisak, os-ke anane efa karuemi efa kekanowam-ikua. Yo koora-pa efa wuap seniw efa kaikamik nain emina me efa ururek, weetak. Ne Rom ekapok nain me walimak, efa akupam-miok efa imenak. Naapeya Mua Maneka fariyem, ona teeria unow onaiya wia kemalep wia naapinok naiyem. ¹⁸Ne pun feenap naiyem, Mua Maneka o kemalep ikoka yiena Maneka ekapow fofa-pa asipeya samor me aawinok. Yo iiriw Efesus-pa ikem nain pun manek akena efa asipam-ikua nain no baliwep amisaren.

Yeesus Krai irakow mua eliwa wiar ikowa

2 ¹Aria muuka, no Yeesus Krai yia kemaliya nain kema suuwap kekanep ike. ²Mua unowa mokok epa-pa opora maem-ikemkun efar miimam-ikon nain efar aawon. Naeya wi mua eena Mua Maneka opor uuwowa maken akena uuwimik nain opora kakeniw naap wia maakem-ike. Ne wis pun mua oko wia maakowa baliwep fauk.

³No Yeesus Krai irakow mua eliwa saarik sirirowa akuawem-ike, i aawem-ikaimik naap. ⁴Feenap saarik, irakow mua yena woos mua uuwowa

efar urufap efa kemelinok naep uuwowa oko oko-pa me ariya, weetak. Irakow uuwowa-pariw ikaiya. ⁵Aria mua eena wiam akimami karuimik nain oram me nomakimik, karuow sira baliwep ookap karuowa nomakep unum maneka aawimik. ⁶Ne manin uuwowa pun sira naapiw, mua kerew uuwiya nain o kiikir enowa perekinon. ⁷Mua Maneka ona kema nieya kema pukep maa unowa amisarinan, naapeya yo opora eena maem fain kema suuwe.

⁸No Yeesus Kraiss kema suuwam-ike. O Dewit nembesir-ke, umep iikirak. O opor eliwa anane wia maakem-miawiyem nain naap ikua. ⁹Yoppor eliwa nain wia maakem-miawem nain sirirowa yiemi mua samora saarik seniw efa kaikiwkin ikem. Nain Mua Maneka opora wiar kaikowa me pepep. ¹⁰Wi mua eena Mua Maneka ona wia nanikap wia aawowa maek nain wi Yeesus Kraiss opora wiar opiwkin wia aawinon. Ne o anane mia dubila ne unum maneka ikaeya wis pun naap ikaikuan. Yo nain naep kekanep sirirowa unowa nain naap akuawem-ikaiyem.

¹¹Aria opora fain makena-ke,

“I o wameiya umemik nain o wameiya eliwa ikaiyen.

¹²I kekanep sirirowa akuawiyen-na ikoka o wameiya owow saria arep miiwa fain urufiyen.

Ne i mikikira iwiyen-na os pun naap, mikikira yiinon.

¹³Nain i opora wiar opap o piipuiyen-na o naap weetak, ona opora maek nain naap oninon. Moram o wame sailowa me pepep.”

Mua Maneka uuwow mua makena arowa

¹⁴Aria yo opora maiyem fain no anane maneka wi unowiya wia kemapawam-ike. Ne pun Mua Maneka mokok epa-pa opor kekanowa wia maakeya wi opor ara kuisow kuisow nain maemi oporiw me irakem-ikauk. Sira naap nain-ke me yia asipiya, weetak, wi opora miimimik nain wia wakiowawiya. ¹⁵Aria no nena feenap one, Mua Maneka uuwowa efar kookalinok naep kekanep uuwow mua makena ne eliwa ikowa nain kerew akena akime. Naap onami emin ururowa marew opora nain baliwep wia fookominan. ¹⁶Wi Mua Maneka opora me wiar maowa opora sira-sira aakunimik nain wia baurare. Opora sira naap nain-ke mua kema wia mikeya Mua Maneka iiwawun piipuikuan. ¹⁷Opora naap nain ikemika saarik, gelemuta nain ewur akena geewemi manekarep iiwawun peelaliya naap. Imeneus Filetus ikos pun wi opora sira naap nain-ke. ¹⁸Wi pauferami opor makena me aakunimik. Wi feenap maimik, wi umemik nain iiriw iikiramik. Naap maemi mua opor makena ookimik nain kema wia momorimik. ¹⁹Nain, Mua Maneka ona teeria poka kekanowa saarik, iiriw iimarowap-pueya koonep ikua. Poka neeke opora feenap siisimok, “Mua Maneka ona teeria iiriw wia amisarep ikua,” ne opora oko feenap, “Wi feenap maep-na, i yiena Maneka teeria-pa wiar ikemik, naap wiam naimik nain sira samora onowa piipuaik.”

²⁰Aria feenap, saria maneka koorapa epira sira-sira ikomakek. Epira rookasep papako enow maneka onami neeke maa enowa wuimik ne papako wiena anane maa enowa wuimik. ²¹Ne o mua pina onowa piipuap eliw akena ikainon-na, feenap maiyem, o epira eliwa eena fofa manekapa maa enowa wuimik nain saarik. Uuwowa eliw akena oninon. Naemi ikoka ona saria-ke uuwowa ele-eliwa iweya pepekinon.

²²Aria no takira ikon, mia kookalowa sira-sira nefar imenarem-ikaiya nain mikikira iwe. Ne sira makena ne eliwa ookami kekanep opora opam-ike, mua wia saliwami wia kookalem-ike, ne saria wiowa sira nain kema manekiw ike. Wi teeria eena kema melina ikok Mua Maneka yia asipinok naep farem-ikaimik nain wiamiya naap akena ike. ²³No amisaren, wi amis marew, opora momor imenami aakunimik nain irakowa imenimik, naapeya sira naap nain mikikira iwe. ²⁴Mua Maneka uuwow mua me riirinok, naap nain-ko me ikua. Mua wia saliwow manekiw ikainok, opor makena suule wia onowa kemaiw ikainok, ne kekelka ikok kekanowa uuwam-ikainok. ²⁵Mua Maneka-ke wi emina kekanimik nain kema wia kiripeya opor makena wiar amisarikuan-yon. Naap maep o kekelka uuwami woosa wia kakeninok. ²⁶Naeya wi iiriw eena Satan-ke top-pa wia aaweya kookalowa wiar ookam-ikemik nain woos eliwa aawep kema kirep Mua Maneka teeria wiar oraikuan, naap maep uuwam-ikainok.

Miiwa weeserow epa

3 ¹Aria no fain amisarep kema aawe, miiwa weeserow epa-pa pina ne sirirowa unowa imenarinon. ²Wi ikoka sira feenap onikuan, yo yaisow naowa sira, maamuma kookalem-ikowa, unuma wame pirami mua papako wia porowa sira, firekow opora aakunowa, onak wiawi opora wiar fienam-ikowa. Ne sira eliwa-ke me naem-ikaikuan, Mua Maneka mikikira iwikuan, ³me wia kemalikuan, wia iuwarep me wia baliwikuan, wadol opora-pa wia firekikuan, mia me wiam kaikikuan, wia iririmikuan, sira eliwa onowa miatinikuan, ⁴wiena womar wia samorikuan, maa kema suuwowa marew momor onikuan, yo maneka-ke wiam naikuan, ne Mua Maneka ookowa miatinep maa kookalowa ne wiena mia kookalowa sira-sira nain ookikuan. ⁵Wi oram mia anian-ke Mua Maneka opora wiar ookikuan, nain ona kekanowa ne sira makena me wiar amisarikuan. Wi mua sira naap nain miir onoma me wiar eke.

⁶Wi mua sira naap nain papako wi emeria kema kekanowa marewa nain koor wiar ikiwep opor afile wuami kema wia momorimik. Wi emeria nain pina onomakemik nain-ke wia ifemakep ikua, ne mia kookalowa sira kamenap wiar imenariya nain ookap-puimik. ⁷Wi anane opor miililina miimowa kookalimik, nain wi opor makena kamenap amisarikuan. ⁸Iiriw mua wiam erup, Yanes Yambres ikos Moses

iiwuaremik,^a ne wi mua wia maiyem nain pun naap, i opor makena maimik nain yiar poraimik. Wi kema iiwawun momoraremik, naapeya opor makena ookowa nain wi me pepeke akena. ⁹Nain wi sira nain neeke me wiar manekarion, moram wienna momor sira nain wiar ariman areya wiar amisarikuan, iiriw wi mua wiam erup onamik naap.

Mua Maneka opora wiar opa-afure maakek

¹⁰Nain opora mua unowa wia maakem-miem nain no efar amisar-afuran, ne sira kamenap ikok uuiyem nain pun. Yo Mua Maneka opora kakeniw opiyem, ne kekelka ikok mua wia kookaliyem, ne kekanep ikaiyem. ¹¹Wi mua sira samora efa oniwwin sirirowa sira-sira aawiyem, ne uuwow yoowa aawiyem, nain iiwawun efa amisaren. Eena yo Antiok, Aikoniam ne Listra-pa ikok sirirowa aawem nain. Nain Mua Maneka ona efa asipam-ikaeya yeeliwa ikem. ¹²Makena, wi mua Yeesus Krai teeria-pa wiar ikok Mua Maneka sira wiar ookimik nain sirirowa maneka wiikuan. ¹³Ne wi mua sira samora onimik nain, ne wadolalep i profet-ke wiam naemi mua oko wia peeskimimik wi nain naap oni-ikiwwin sira nain iiwawun manekarion. Satan-ke wia peeskimeya mua oko wia wadolalowimik.

¹⁴Nain yo opor makena nefa maakem nain no kekanowa opap ookam-ike. Moram wi mua eena opor makena nefa maakemik nain wia amisaren. ¹⁵Ne pun no iiriw takira-pa Mua Maneka opor unowa amisaren. Nain-ke woos eliwa nieya Yeesus Krai opora wiar opan. Naeya Mua Maneka-ke nefa aaweya no eliw ikainan. ¹⁶Opor unowiya eena Mua Maneka opora-pa ikomakek nain ona Ewar-ke kema wieya maemi siisimemik. Opora nain-ke eliw amisa yiinon, ne sira nomakiyen-na opor makena yia maakinon, pina oniyen-na yia kakeninon, ne baliwep ikowa nain yia ofakowinon. ¹⁷Naap yia asipeya i eena Mua Maneka uuwomimik nain opor unowa nan kekanowa pepeke aawep uuwowa ele-eliwa oniyen.

I Mua Maneka opora ariman wiar wuiyen

4 ¹⁻²Yeesus Krai kiiriw ekapinon, ne miiw maa muutitik os-ke onamiarep urufam-ikainon. Naap ikok yia mekawinon, mua iiriw umemik nain ne mokok enuma ikemik nain pun. Yo nain naep Mua Maneka ne Yeesus Krai mokoka-pa opor kekanowa nefa maakiyem, no opora wia wafuromowa me piipue. Wi opora nefar miimowa kookalikuan-i e weetak-i, oram wia maakem-ike. Ne sira samora

^a 3.8 Wi Yuuda iiriw Isip-pa ikaiwwin Moses-ke wia aawep Isip piipu naep onak. Nain Isip owow saria maneka-ke me ikiwuk naep wia samoram-ikua. Ne serua mua wiam erup maikua onami Moses iiwuaremik. Wi Yuuda nanar awona-ke maek, wiam erup nain unuma Yanes Yambres ikos.

oniwkin wia kakankami wia kakene, ne opora wia maakemi kema wiar iikirowam-ike. Anane naap kekelkiya uuwami suule baliwep wiem-ike. ³Moram wi opor makena me miimowa wiena kookalowiw ookow epa nain ikoka imenarinson. Iir nain ifan afililowa muuta nain kookalep somek mua unowa momor wia aawikuan. ⁴Neeke wi opor makena miimowa piipup nanar oram nain miimowa kookalikuan. ⁵Nain no maa kema suuwami baliwep ike. Sirirowa ne pina akuawem-ike. Mua Maneka opora naap wia maakem-ike. Neemi uuwowa no mia-pa wuomek nain baliwep uuwam-ikoma.

⁶Yo miiwa fain fan piipuiyem. Yo sirirowa nain wi Mua Maneka patrirowa onu naep wain eka sawikimik nain saarik. ⁷Yo karuowa akimam nain welawam, baliwep akena karuep nomakem. Ne kekanep Mua Maneka opora wiar opam. ⁸Naapeya aakisa siisia eliwa urufowa nain nan efar ikua. Feenap, yiena Maneka-ke naap efa mainon, no mua kaken eliwa-ke. Maa siisia eliwa nain yiena Maneka eena mua yia mekawiya nain-ke yiinon. Me yo yaisow, wi mua unowa o ekapowa naep kemaiw wiam tuupami arewap ikaimik nain pun.

Opora papako

⁹Yo nefa maakiyem, sira eliwa, no kekanep era akupap ewur akena efar ekape akena. ¹⁰Moram Keresen Galesia ikiwok ne Taitus Dalmesia ikiwok. Ne Demas miiw sira kema manekiw ikok efa piipup Tesalonaika ikiwok. ¹¹Luk waisow efamiya ikua. No ekapemi Mak aawep ikos ekapeka, ikoka os-ke uuwowa baliwep efa asipinon. ¹²Ne Tikikus iiriw sesekamkun Efesus ikiwok. ¹³Aria no ekapemi yena mia suuwowa kuruma aawep feekiya ekape. Nain Troas owowa Karpus koora-pa wiar wuam. Ne buk unowa pun feekiya aawep pekapome. Ne buk papako maa eneka kanima-pa opora siisimemik nain kema me irinare.

¹⁴Ne Alesanda mua eena bras-pa maa sirariya nain-ke yo manek akena efa samorak. Sira efa onak nain ikoka Mua Maneka ona kiripinon. ¹⁵Os-ke i opora maimik nain manek akena yiar poraiya, naapeya nos pun mua nain uru-urufami ike.

¹⁶Efa samorami mokomokoka yo opora-pa efa wuamik nain yo yaisow akena iimarep aakunem, mua kuisow mikikira-pa-ko me efar iimaremik. Wi unowa nain yo efa piipuamik. Aa, naap efa onamik nain Mua Maneka wi pina nain me wia kiripominok wia naiyem. ¹⁷Nain yiena Maneka ona efamiya ikok efa kekanowam-ikua. Naeya yo yena uuwowa silewami wi owow-owow mua nan ikemik nain Yeesus opor eliwa wia maakem. Yo yiena Maneka ona efamiya ikaeya laiyan opaimika-pa me efa wafuramik. ¹⁸Ne ikoka pun ona efa asipami wi iiwua wapena-pa efa aawep owow iinan ona pika neeke efa wuinon. Naeya anane maneka unum maneka wiar fakeram-ikaiyen. Makena.

¹⁹Aria nos-ke Prisila ne Akuila neek wia maake, yo wiam erup nain eliwa ikeka wia naiyem, ne Onesiforus teeria nan ikemik nain pun naap, eliwa ikauk wia naiyem. ²⁰Erastus Korin-pa nan ikua ne Trofimus napumareya Miletus-pa nan wuam. ²¹Aria no ekapowa nain ewar asia saana me kererowa ikaeya ekape. Yubulus, Pudens, Linus, Klodia ne wi Kristen papako wi unowiya no eliwa ike nefa naimik.

²²Yiena Maneka nefamiya ikainok naiyem. Ne ni unowiya Mua Maneka nia saliwami nia asipam-ikainok.